

# 1 Yóni

*Ísu wíyómpa'a iyówana Yóni Ísuni kísau-waasi kaumbo-wáái-áátáiyá'íyo miyáumai-aatai maisuwéna maanáái agaimái tímakaiye. Tuwímbai karo'-áái simátimesa sésa Ísu Maníkón-ááninko póna waási-úramba ímba ú'mai mérariye sésa fí'on-karo'-aaiwara'a simátíma'maesa núwana Yóni iséna miwítí imáyáa arupíse uwátinkanae séna maanáái agaimái mátímakaiye.*

*Maníkóní imáyáamo aráásímíwain-aai.*

<sup>1</sup> Ísu Káráisiti Maníkóní imáyáa aráásímíwaisaama póna waási aúí'a úmai maé'mae'a iyawini áwáugon-iyé. Minááisáfé'a maanáúfái agaimái kentópa'a tuwáúnana wéwiye. Áwáura'a maramá ímba wéronka'a wemá maé'éimba ánaenka'a marapá'á kuména keséta mérowata súranta awánamai kawel'á éta wenáái iséta siyáántamba aneté ta'ótokaumne. <sup>2</sup> Aúí'a úmai maé'mae'a iyawini áwáugo afowámpá'á maé'éimba marapá'á kuména keséta mérowata awánareta póta minááisá wésimatimune. <sup>3</sup> Kesáá Maníkóe ááninko Ísu Káráisitiye'a kááisamaisa méraumne. Awánaraundawe ísaraundawe kembiwíwará'á simátimunda póta Maníkóe ááninkoe'a kááisamaisa méraundantemba kembiwí miyá ónááwe. <sup>4</sup> Kentáásirumba kawel'-úmai óraa'a uwásinkaindasafe'a maanáúfái agai-timúne.

*Maníkó sámó kaiwáíní áwáugon-aai.*

5 Maníkón-ááninko simásímakain-aaisa simátimeta séta Maníkó sámó kaiwáíní áwáuma póna kumeu'ó in-tántáá'á wempímbá ímba wéraiye. 6 Miyáumai kumeu'ó in-áémpá'á méraamba Maníkóe'a kááísamaisa méraumnemo sewí karo'á sésa érai'-aaigoni áwáufimba ímba méraawe. 7 Énifo Maníkó sámó kain-áémpá'ó méraintemba miyáumai sámó kain-áémpá'ó méraundasa wení waáiseta kááísamaisa méraumne. Miyáumai Maníkón-ááninko Ísuma kentáásáféna imáyáa éna kumpuwúwana wení naagó kuména póna kentáásí sáwí-imayaa maisíyu'maenasa wéiyiye. 8 Kempíntá sáwí-imayaa ímba wéraiyesaamo súndasa kesirumpin-káro'-ááísá súnanasa Maníkóní érai'-aaigo kesirumpintá ímba wéraiye. 9 Afora'ó Maníkómpátáámó sáwí-imayaasafetaamo simáménanasaamo éna Maníkó kentáásí sáwí-imayaa maisiyuwénasa seyaafá-sáwí-imáyáa arupísesa uwásinkainiye. Maníkó wemó siyáintemba miyá éna miyáumai kawé'-aantemba éna póna sáwí-imayaa maisiyuwénasa arupísesa wéuwasinkaiye. 10 Maníkó séna seyaafá'nánká sáwí'a uráawemo simbánifo kesáámá séta ímba sáwí'a úne séta Maníkó karo'-áái siyé súnana Maníkóní ásé-aigo ímba sirumpintá wéwaiye.

## 2

### *Karáísiti seyaafá'nánká áfombo faisínkáin-ai.*

1 Kesí iyámpóisono. Ímba sáwí'a iyantafe'la maanáái aúfáífimba agai-timúne. Énifo sáwí'o íyanamo éna áfombo faisínkáíwaisa ména

kesifompátá áísai íníye. Wemá Ísu Káráísiti arupísemo iwáísá kesifompátá áísai íníye. <sup>2</sup> Sáwítaamo uráunda-meyamba kentááfá'á ímba tíno séna maimaéna pukáíye. Ímba kentáásí sáwí-meyan-aantembanifo seyaafá'-wáásítí sáwí-meyankwara'a maitiyuwáíndasafena pukáíye.

<sup>3</sup> Maníkón-aaimo taawiyafétaamo únda érai'a weséta kááísamaisa méraumnesa súne. <sup>4</sup> Maníkón-aaimo ímbo taawiyáfónka'o ombá Maníkóe'a kááísamai méraumnemo sembá karo'á sewaná miwífímbá Maníkóní érai'-aai ímba wéraiye. <sup>5-6</sup> Énifo Maníkón-aaimo taawiyáfówi Maníkómpá'á tirumbá áma'mai kawel'á wéowe. Kesáámó Maníkóe'a kááísamaisa méraumnesaamo súndawisa Ísu Káráísitimo méraintemba kesáá miyásá úmáisá ménaumne. Miyásáámó únda érai'a Maníkóe'a kááísamaisa méraumnesa súne.

*Ááéraan-amaankoma aúí'o uráin-ai.*

<sup>7</sup> Kesí waási ísáaro. Kemó agaúnda ímba aú-amaamban-ifo ááéraan-amaamba agai-timúne. Aifa'ó simátímakaamba é'a ísaraan-amaamba agai-timúne. <sup>8</sup> Énifo kumeu'ó in-tántáá'á áwiyo'wisana érai'a sámó kain-tántáá'á wépaape-ímba póna ááéraan-amaamba aúí'a úmai wépaape-íye. Ísu Káráísitini kísaufinkemba minámáámbá paápé uréna kempínkwará'á minámáámbá wépaape-íye.

<sup>9</sup> Kentí waásimo tíyámbo uwátínkáámbanifo sámó kain-áémpá'á méraumnemo sembá sámó kain-áémpá'á ímba méraafo kumeu'ó

in-áémpá'á paaí méraawe. <sup>10</sup> Énifo kentí waásimo tirumbó tíméwi sámó kain-áémpá'á méraamba pósa miwífímbá sáwí-tantaa'a ímba wéraimba pósa ff'owi tuwánésa sáwí-ampa'a ímba wégowe. <sup>11</sup> Énifo kentí waásisafesamo tiyámbo uwátínkááwi miwí kumeu'ó in-áémpá'á méraawana kumeu'ó in-tántáákó túrampa'a kumeu'á uwáwisasa múgu'maagu'a úmaesa wégowe.

<sup>12</sup> Kesí iyámpóisono. Kembiwísáféna Ísu Káraísiti pukáimba póna Maníkó kentí sáwí-imayaa maitiyukaintafe'a kemá maanáúfái agai-timúne. <sup>13</sup> Óraa'-waasiono. Áwáura'a maramá ímba wérowana moóráwigo maé'éimba wemá káfé'wara'a méraisa'a wení áwáuma isáántafe'a maanáúfái agai-timúne. Ifótóno. Waántáwankomba iyáákaraantafe'a maanáúfái agai-timúne. <sup>14</sup> Iyámpóisono. Maníkó kentifo isa'á wempá'á tiyáantafe'a maanáúfái agai-timúne. Óraa'-waasiono. Áwáura'a moóráwigo maé'éimba wemá káfé'wara'a méraisa'a wení áwáuma isáántafe'a maanáúfái agai-timúne. Ifótóno. Fasi'ámai mé'a Maníkón-aaí tirumpimbá talótore'a waántáwankomba iyáákaraantafe'a maanáúfái agai-timúne.

<sup>15</sup> Maníkómpá'ó ímbo tewímó ontembá mindásafe'a ímba aamoín-oro. Mararákén-tántáátáfé'a ímba aamoín-oro. Mararákén-tántáátáfésamo aamoimó owí Maníkóntáfésa ímba aamoín-owe. <sup>16</sup> Mararákén-kwaásimó owíní áwáuma ímba Maníkómpákémbá owe. Waási

kentí imáyáafinkemba ésa fí'lowiti moparawímbá túraniyamba tuwésa túwí'a maimaé iyésamo ombá ímba Maníkómpákémbá ofo mararákén-ámhá wéaraaiwaewe. <sup>17</sup> Mararákén-tántáá'ó tirááímo tain-tántáá'á maambárárá'á tai'áwinasa Maníkómbó arááímo táinda-i'ó on-kwáási aasiyaasí maé'mae'a ónááwe.

*Karáísitini namuro-wáásí táái.*

<sup>18</sup> Kesí iyámpóísono. Ánaaen-kanaa maramó tai'áinda-kanaa ampáánká'á tínye. Ánaaemba Ísu Karáísitini namuro-wáásígó tínyema suwa'á ísaraawe. Karáísitini namuro-wáásí sáwífa'a é'a paápé uráamba póta mindásafeta ánaaen-kanaa ampáánká'á tínyema sune. <sup>19</sup> Kentááfinkémbá Karáísitini namuro-wáásí moórá-mora méresa pósa iyáfasinesa paápé ésa siyuwésasa kóuraawe. Érai'ó kentáási waásimo méronkaka úwoi méraawaisino. Siyuwésasa kóuraantafeta ímba kentáási waásin-owe sune.

<sup>20</sup> Ísu Karáísiti Maníkóni ámútankomba ai'marówana kuména kentirumpimbá méraisa'a pó'a érai'-aai wéisaawe. <sup>21</sup> Érai'-aai ímba ísáántafe'a sé'a ímbanifo érai'-aai ísáántafe'a maanáúfái agáúmne. Érai'-aai finkemba karo'-áái ímba paápé isa'á ísáántafe'a maanáúfái agai-timúne.

<sup>22</sup> Óraa-karo'ó sen-kwáási maarán-kwáásín-owe. Ísu Karáísitintafesa Maníkó ímba iyáfasinankaraiwain-iye sen-kwáási ésa Ísu Karáísitini namuro-wáásí-í'a ésa Maníkónté ááninkonte'a tínaaeni'a

wéuwatimewe. <sup>23</sup> Maníkón-ááninkomba tínaaeni'a uwámewi afowáankwára'á miyá ombánifo Ísu Káráísitintafesa Maníkón-ááninkon-iyé sewí ááninkonte afowántépa'a kááísamai méraawe.

<sup>24</sup> Ísun-aaimo aifa'ó ísaraan-aaí tirumpimbá fasi'ámai ta'ótóráámba ímba ifátuwe'a miyáumai Maníkónté ááninkontepa'a kááísamai maé'mae'a oro. <sup>25</sup> Maarán-áái Ísu Káráísiti óraaka simásimenasa sèna aúí'a úmai maé'mae'a íyani'a uwátinkaumnesa simásímakaiye.

<sup>26</sup> Karo'-áái simátínkáafo sé'a maanáúfái agaimái timúne. <sup>27</sup> Karo'-áái simátiyuwaawi ombánifo Ísu Káráísiti Maníkóní ámútamba tirumpimbá tínkaraimba póna maé'mae'a éna ímba karo'-áái simátimena érai'-aai wésimatimiye. Miyámó simátímísa'o ombá érai'-aaiye karo'-ááiyé tuwínkaa'a owe. Simátímíntemba miyá é'a Ísu Káráísitiye'a kááísamai méraawe.

<sup>28</sup> Kesí iyámpóísono. Wesé'a kááísamai méraamba pó'a Ísu Káráísiti kumíndara'a wenaúranka'a ímba tigaesáfé'a é'a úwoi fasi'ámai ménaawe. <sup>29</sup> Ísu Káráísiti arupíse úmai méraain-aaí é'a ísaraawe. Moóra'-aaiwara'a ísáaro, Miyáumai arupíse úmai méraawi érai'a Maníkóní iyámpóín-owe.

### 3

*Maníkóní iyámpóí-táái.*

1 Maníkó arumbá óraaka'á wésimiye. Mindásafe'a imáyáan-oro. Maníkó aruntá siménasaam-pona kentáásáféna kesí iyámpóín-owe wésiye. Kesáá érai'a wení iyámpóisa úne. Maníkómpá'á ímba tiyáawi Maníkóní áwáuma ímba awánésa kentáásí áwáuwara'a ímba suwánaawe. <sup>2</sup> Kesí waásisono. Káfé'a Maníkóní iyámpóí-i'a úmaisá méraundasa ánaaemba nóra waásisaawa ménaumno. Mináái ímba ísaraundanifo moórá-aaimo ísaraunda simátimenaumne. Ísu Káráisiti kumíndara'a kawé'-úmai awánaandasa póta wenkáánita úmaisá ménaumne. Miyán-áái ísaraumne. <sup>3</sup> Mináái isésamo amu'maráawi Káráisiti arupísemo úmaimo méraintemba arupíse úmai méraafo káráwiyoro.

4 Sáwí-imayaamo ombá isaná ámáámbo taráisómbo isaná minkáé-tántáákó nimbórái'a iye. Miyáumai

sáwí-imayaamo owí Maníkóní ámáámbo tínaaeni'a uwámesa taráisómbo póna miyámó on-ánóndáá miwífimbá wéiniye. <sup>5</sup> Ísu Káráisiti waásiti sáwí-imayaa maitiyuwáíndasafena marapá'á kunkáimba wempímbá sáwí-imayaa ímba wéraiye-aai é'a ísaraawe. <sup>6</sup> Miyáumai Ísu Káráisitiye'o kááisamai méraawi miwífimbá ímba sáwí-imayaa waé'wae'a ifo sáwí-imayaa waé'wae'a iwáí Káráisitimpa'a ímba tésa wenáái ímba ísááwe.

<sup>7</sup> Kesí iyámpóisono. Karo'-áái simátínkáafo sé'a káráwiyoro. Káráisiti arupíse úmai méraiwai wemó intembó miyámó úmae'o iyówi arupísemo

on-kwáásín-owe. <sup>8</sup> Áwáura'a waántáwanko sáwí'a uréna miyá úmae iyéna káfé'wara'a miyá wéiyé. Sáwí'o úmaesamo íyówi waántáwankoni waásín-owe. Waántáwankoni kísau taí'ásuwainkwae séna Maníkó ááninkomba ai'marówana marapá'á kunkáiyé.

<sup>9</sup> Maníkóní iyámpói pósa Maníkóní fasi'aénkó miwífimbá wéraintafesa pósa ímba sáwí'a úmaesa wéiyowe. Maníkóní fasi'aén-iyámpóísómbá pósa ímba sáwí'a úmaesa wéiyowe. <sup>10</sup> Ímbo arupísemo úmaimo méraawi ímba Maníkóní iyámpóín-owe. Kentí waásimo tirumbó ímbo tíméwi ímba Maníkóní iyámpóín-owe. Miyáumaisa Maníkóní waásiye waántáwankoni waásiye tuwímbaisa ísaraumne.

*Moórá-mora tirumbó tímén-aaí.*

<sup>11</sup> Moórá-mora tirumbá tíméro-aaí ááéma ísaraawe. <sup>12</sup> Ándámun-ááninkon-awí'a Kénimo uráintemba ímba miyán-oro. Kéni waántáwankon-aráá'a póna áfákomba tufúwana pukáimba maarásáféna tufúwana pukáiyé. Áfáko kawé'-ímáyáá mérowana Kéni sáwí-imayaa úmai ména póna áfákomba tufúwana pukáiyé.

<sup>13</sup> Miyaráán-úmai Maníkómpá'á ímbo tiyáawi kempímbá tirumbá sáwí'a uwátinkaiyantafena ímba táá'a íno. <sup>14</sup> Maníkóní akúmbá sirumbá tímúndasafeta séta Maníkóní némpa'a méraandasaawini áwáuma tuwéta kawé'-úmáimo méraandasaawini áwáura'a taméraumnesa sune. Kentí waási tirumbá ímbo tíméwi Maníkóní némpa'a paái méraawe. <sup>15</sup> Kentí waásimo tiyámbo



uwátínkáán-kwaasi tínkamiyasa puwíyan-kwaasin-owe. Miyámó owí aúí'ò úmaimo maé'mae'ò owíní áwáura'a ímba méraawe. <sup>16</sup> Ísu Káráísiti arumbá siménasa ímba úwoi méraimba súwa'nai indasafena kentáásáfénawe séna pukáiyé. Miyámó uráintafeta arumbá símakaiyesa sune. Maníkóní akúmbá túwa'nai eta puwúnafo ímba sendasá úwoi túwa'naisa ónaumne. <sup>17</sup> Óntawara'-waasi kentí waási tómbó ímbo makáawi tuwánésa ímba túwa'nai ombá sésa Maníkómbá sirumbá amúne sembá karo'á sewé. <sup>18</sup> Kesí iyámpóisono. Sirumbá timúnemo sembá ímba tóikakemba sé'a érai'a tirumpinkémbá sé'a túwa'nai oro.

*Maníkómpá'á fasi'ámaisamo méraunda-aai.*

<sup>19</sup> Sirumbá timétaamo túwa'nai úndasa miyámó únda-waasisa arupise úmaisa méraumne. Miyámó únda Maníkón-aúrankata fasi'ámaisa méraumne. <sup>20</sup> Énifo kesáá sáwí'ò úndasafenasa kentáásirunko umbái taifo Maníkó seyaafá-tántáá'á awánéna minúmbái-tántáákómbá iyáákaisata Maníkón-aúrankata fasi'ámaisa méraumne. <sup>21</sup> Kesí waásisono. Mindásafeta imáyáa úndasa kentáásirunko ímba umbái taisatá Maníkón-aúrankata fasi'ámaisa méraumne.

<sup>22</sup> Wenáái taawiyafétaawe wemó aamoimó índa-i'a úndasafetaawe áisai únda-tantaa'a úwoisa wésimiye. <sup>23</sup> Maníkó óraaka séna kesááninko Ísu Káráísitin-awika'a timankúnkúmba é'a seyaafá'-wáásíímbá tirumbá timé'a méraaro siyáimba mináái Ísu Káráísiti óraaka simásímakaiye. <sup>24</sup> Maníkón-aai taawiyáfówi Maníkóe'a kááisamai méraawana

miwísé'a kááísamai méraiye. Maníkó wení ámútamba ai'marówana sirumpintá kumbéna simásimenasa séna Maníkó kesé'a kááísamai méraiye sisatá wéisaumne.

## 4

### *Érai'-amutankonte karo'-ámútánkónté-taai.*

<sup>1</sup> Kesí waásisono. Sáwífa'-waasi karo'-ámáámbá simátíma'maesa nésa Maníkóní ámútanko kesirumpimbá méraiye mo sembá ímba ááéma érai'e seró. Miyámó sentáfé'a miwí tirumpimbá mérain-amutamba Maníkóní ámútana'i fí'owani ámútana'iyo mindá awáné'a mináái ísáaro.

<sup>2</sup> Ísu Káráísiti Maníkóe ména marapá'á waási kunúkáiye sewí miwí tirumpimbá Maníkóní ámútanko méraiye. Minááímó sewa'ó ísáámba Maníkóní ámútankoma miwífimbá méraiye seró.

<sup>3</sup> Ísu Káráísitintafesa minááímó ímbo sewí miwí tirumpimbá mérain-amutanko ímba Maníkóní ámútankon-ifo mindá Káráísitini namuro-wáásígóní ámútankon-iye. Káráísitini namuro-wáásígó tínda-aai ísaraamba isaná marapá'á méraiye.

<sup>4</sup> Kesí iyámpóisono. Maníkón-aráá'a é'a karo'-ámáámbó simátíméwi iyáákaraawe. Maníkóní ámútanko kentirumpimbá méraifo Maníkómpá'ó ímbo tiyáawi miwí tirumpimbá fí'on-amutanko méraiye. Maníkóní ámútanko minámútánkómbá iyáákaraiye. <sup>5</sup> Karo'-ámáámbó simátíméwi Maníkómpá'á ímbo tembá marapá'ó wérain-aai simátíméwasa marapá'-wáási miwí táái wéisaawe. <sup>6</sup> Kesáá Maníkóní waásisa únasasa

Maníkóní waási kesááisa ísááfo fí'on-kwaasi ímba  
 Maníkóní waási pása kesááisa ímba wéisaawe.  
 Miyáumaisa érai'-aaimo sí-ámútánkó miwífímbá  
 mérain-kwaasiye karo'-ááímó sí-ámútánkó  
 mérain-kwaasiye tuwínkaa'-úmaeta wéiyune.

*Maníkó arumbó tímín-aaí.*

<sup>7</sup> Kesí waásisono. Tirumbó tíméwini áwáuma  
 wemá Maníkó póta Maníkóní akúmbá siruntá  
 tíméno. Tirumbá tíméwi Maníkómpá'á tésa  
 wení waási-i'a wéowe. <sup>8</sup> Maníkó tirumbá  
 tíméwini áwáuma pása tirumbá ímba tímén-  
 kwaasi Maníkómpá'á ímba wétewe. <sup>9</sup> Maníkó  
 mimbórá-áánínkómbá ai'marówana marapá'á  
 kumbéna kentáásáfénawe séna puwéna aúí'a  
 úmai maé'mae'o ondasáfénasa puwéna arumbá  
 símakainta póna miyá uráíye. <sup>10</sup> Maníkómbá  
 siruntáámó amúndasa ímba óraata ámakauñe.  
 Maníkó arumbá siménasa wenááninkomba  
 ai'marówana marapá'á kumbéna sáwí-  
 awausaamo únda-meyamba maisiyuwáinana  
 kentááfá'á ímba tínkwae séna pukáíye. Miyámó  
 uráimba Maníkó

óraa'-arumba símakaiye. <sup>11</sup> Kesí waásisono.  
 Maníkó miyáumai arumbá símínta póta kentáási  
 waási miyáumai siruntá tíméno. <sup>12</sup> Waási  
 Maníkón-ane'á ímba awánaawe. Kentáási waási  
 siruntá timúndasa Maníkó keséta méraisata  
 érai'a siruntá Maníkómbá amúne.

<sup>13</sup> Maníkóní ámútanko kentáásirumpimba  
 méraintafeta séta kesáá Maníkóe'a kááísamai  
 méraunanasa Maníkó keséta kááísamai  
 méraiyesa sune. <sup>14</sup> Kentáásifowa ááninkomba  
 ai'marówana sáwí'o úmaimo méraampinkemba  
 faútinkaindasafena marapá'á kumúwata

awánaraundasa simátimune. <sup>15</sup> Ísuntafesamo Maníkón-ááninkon-iyemo sewí Maníkóe'a kááísamai méraawana Maníkó miwísé'a kááísamai méraiye. <sup>16</sup> Maníkó arumbá símisata mindásafeta érai'esa súne.

Maníkó tirumbó tíméwini áwáuma Maníkó isasá pósa tirumbó tíméwi Maníkóe'a kááísamai méraawana Maníkó miwísé'a méraiye. <sup>17</sup> Maníkó kentáá imáyáa símakaisata siruntá Maníkómbá améta póta méraundawini áwáumo síesai índakanaamo tándara'a fasi'ámáisa ménaumne. Ísu Káráísiti wenarumbó símíntenta marapá'ó méraundarata siruntá timúndasa póta síesai índakanaamo tándara'a fasi'ámáisa ménaumne. <sup>18</sup> Maníkómbó tirumbó áméwi ímba inkáísówe. Érai'a Maníkómbó tirumbó áméwi miwífinkémbá inkaisí-ímáyáá ímba wéraiye. Sáwí'o uráambeyantafesamo inkáísówi Maníkómbá ímba érai'a tirumbá áméwe.

<sup>19</sup> Aifa'á Maníkó arumbó símakaintafeta póta siruntá amúne. <sup>20</sup> Miwítí waásisafesa tirumbó sáwí'o uwátínkááwa'o ombá Maníkómbá sirumbá amúnemo sembá karo'á sewé. Miwítí waási tine'á tuwánésa tirumbá ímba tímakaawi pósa Maníkón-ane'á ímba awánaawi ímba kanaa'á tirumbá áméwe. <sup>21</sup> Ísu Káráísiti óraaka sena Maníkómbá tirumbó áméwi miwítí waásiwara'a tirumbá tíméro siyáiyeye.

## 5

*Marapá-sáwí-kísáúgómbó iyáákaan-ai.*

1 Ísuntafesa sésa Maníkó iyáfasinankaraiwai iyémó sen-ááisáfésa érai'emo sewí Maníkóní iyámpóin-owe. Afowámbá tirumbá améwi ésa wení iyámpóíwara'a tirumbá améwe. 2 Maníkómbá siruntá améta wenáái taawiyaféta póta miyá úndasafeta séta Maníkóní iyámpóíwara'a siruntá timúne. 3 Maníkón-aaí taawiyafúndasa mindá Maníkómbá siruntá amúnanasa wenááigosa ínta umbaisá síyáísata póta taawiyafúne. 4 Ísumpa'a fasi'ámai kááísamai méraundasa póta marapá-sáwí-ímáyáágóntá iyáákaumne. Maníkóní iyámpói seyaafá'á kanaa'á marapá-sáwí-ímáyáágómbá iyáákaamba póna Maníkón-aaigoma ímba umbaí taiyé. 5 Maarán-kwáásí marapá-sáwí-ímáyáágómbá iyáákaawe. Ísuntafesa Maníkón-ááninkon-íye sésa timankúnkúmba owí marapá-sáwí-ímáyáágómbá iyáákaawe.

*Maníkó Ísu Káráísitimbo aráátímakain-aaí.*

6 Ísu Káráísiti marapá'á kumbéna nombá maiyéna puwúwana wení naaemá kunkáíye. Nombó maíndasafena aantemba ímba kunkáíye. Nombá maiyéna puwínana wení naaemá kumíndasafena kunkáíye. Maníkóní ámútanko érai'-aaigoni áwáugo póna séna érai'e Ísu Maníkón-ááninkon-íye wésiye. 7-8 Maníkóní ámútanko siyáin-aaísafeta nombó maiyáíntafeta puwúwana wení naaemá kunkáíntafeta séta Ísu Maníkón-ááninkon-íye sune. Minkáúmbó-tántáá'á paápé uráíntafeta mimbórá-áái séta Ísu Maníkón-ááninkon-íye sune. 9 Waásimo

simátímén-aaí sewatá iséta érai'e súnasaanifo Maníkón-aaigo waási-taai iyáakaraimba póta Maníkó ááninkontafena siyáin-aaísa ísáano. <sup>10</sup> Maníkón-ááninkontafesa timankúnkumbo owí sésa Maníkó siyáintemba érai'e Ísu Maníkón-ááninkon-iyesa sune. Maníkóntáfesa ímbo timankúnkumbo owí sésa Maníkó karo'-áái siyáiyewe. Wemá Maníkó ááninkontafena siyáin-aaísafesa ímbo érai'e senkákémbá Maníkó karo'-áái siyáiyema wésewe. <sup>11</sup> Maníkón-ááninkoma aúí'a úmai maé'mae'a owíní áwáuman-iyewe. Maníkó imáyáasa símísata aúí'a úmai maé'mae'a wéune. Minááísá Maníkó simásímakaiye. <sup>12</sup> Maníkón-ááninkoe'a kááísamai méraawi aúí'a úmai maé'mae'a ofo Maníkón-ááninkoe'o ímbo kááísamai méraawi ímbo aúí'a úmai maé'mae'a wéowe.

*Aúí'a úmai maé'mae'o on-áái.*

<sup>13</sup> Maníkón-ááninkon-awitafe'a timankúnkumbo on-kwáásí kembiwí maanáúfái agai-timúne. Aúí'a úmai maé'mae'a on-ááísafé'a érai'e síwae sé'a maanáúfái agai-timúne. <sup>14</sup> Maníkómbó arááímo táinda-i'o étaamo inañfinkémbó áísai úndasa kesááisa wéisaiye. Mindásafeta wenaúranka'a fasi'ámais méraumne. <sup>15</sup> Inaí sún-dasa ísáin-aaísafeta érai'-aain-iyemo

sún-dasa maarán-ááísafé'wara'a érai'-aai inañfinkémbá sún-da-tantaa'a úwoisa símíyesa sune.

<sup>16</sup> Kentí waásimo sáwí'o íya'o tuwáné'o é'a Maníkómpá'á áísai íyana túwa'nai ínasa Maníkóní némpa'a sáwí-aempa'a maé'mae'a iyampa'a ímbo

kónááwe. Tuwímbai-sawi'o owíní anondáá-meyamba Maníkóní némpa'a sáwí-aempa'a maé'mae'a íyampa'a wíyamba mindásafe'a Maníkómpá'á áísai oro ímba súne. Tuwímbai-sawi'o owíní anondáá-meyamba ímba Maníkóní némpa'a wíyamba mindásafe'a sé'a Maníkómpá'á áísai oro súne. <sup>17</sup> Seyaafá-sáwí'ó owíní anondáá-meyamba wéraifo tuwímbai-sawi'o owíní anondáá-meyamba Maníkó maitiyuwáínasa wení némpa'a sáwí-aempa'a maé'mae'o íyampa'a ímba miyá-sáwí'ó íya'o tuwáné'o é'a Maníkómpá'á áísai íyana túwa'nai ínasa Maníkóní némpa'a sáwí-aempa'a maé'mae'o íyampa'a ímba kónááwe.

<sup>18</sup> Maníkóní iyámpói ésa ímba sáwí'a úmaesa íyówe. Maníkón-ááninko káráwiyaisana póna waántáwanko ímba ta'ótóráísasa pósa ímba sáwí'a úmae íyówata minááísá wéisaumne.

<sup>19</sup> Waántáwanko marapá'-wáásítí óraakon-ifo kesáá Maníkóní waási éta minááísá isáúmne.

<sup>20</sup> Maníkón-ááninko kuména imáyáa símísata érai-Fasi'aenko-úramba isatá awánáúmne. Maníkón-ááninko Ísu Káráísitiye'a kááísamaisa méraundasafeta érai-Fasi'aenkonka'a kááísamaisa méta isáúmne. Érai-Fasi'aenko-úranko éna waásisa aúí'a úmáisa maé'mae'a úndawin-ááninkon-íye. <sup>21</sup> Kesi iyámpóisono. Karo'-mánikómbá seyaafá'á tínaaemba uwátíméro.

*Kemá Yóni kesáái taí'áíye.*

**Aú-aaí símai kááísamakain-aaí**  
**The New Testament in the Awiyaana language of**  
**Papua New Guinea**  
**Nupela Testamen long tokples Awiyaana**

copyright © 1984 Wycliffe Bible Translators, Inc.

Language: Awiyaana

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-17

---

PDF generated using Haiola and XeLaTeX on 11 Nov 2022 from source files dated 9 Oct 2020

0dda5aa4-c019-59cf-b9ee-e1fd4762d49c